

DECLARATION

4825

DV ROY, SVR LA
Paix qu'il a donnée à ses subiects
de la Religion pretenduë reformée,
confirmant les precedents
Edicts de Pacification.

1622

*Publiee en Parlement le vingt vniesme
Novembre 1622.*



J

48

A PARIS,
Chez FED. MOREL, & P. MET-
TAYER, Imprimeurs & Libraires
ordinaires du Roy.
M. DCXXII.
Avec privilege de sa Majesté.



OVIS PAR LA
GRACE DE DIEU
ROY DE FRANCE
ET DE NAVARRE,

A tous ceux qui ces présentes lettres verront, Salut. Comme tout Prince Chrestien, & craignant Dieu, doit auoir en horreur l'effusion du sang de l'hóme créé à l'image du Tout puissant, Aussi est il tenu, & obligé non seulement d'euitier les occasions de guerre ciuile & domestique; mais de rechercher & embrasser tous moyens honorables & legitimes, pour reünir & faire viure ses subiects sous les lois de l'Estat, en bonne concorde & obeyssance. La mes-

me bonté Diuine , qui a cogneu nostre cœur , depuis qu'il luy a pleu nous appeller au regime & gouuernement de ceste Monarchie Françoisse , est iuge de nostre interieur. Et chacun sçait aussi que nos armes ont esté autant iustes , que forcées & necessaires pour le soustien & defense de nostre autorité , Soit contre ceux qui du commencement sous diuers pretextes empruntez , ont excité le trouble durant nostre minorité , ou depuis contre nos subiects, faisans profession de la Religion pretendue reformée, abusez & surprins de l'artifice d'aucuns d'iceux, qui ont cuidé profiter, autant de leur simplicité , que de la diuision publique de nostre Royaume : Ores que nostre intention n'ayt iamais esté autre , à l'exemple loüable des Roys nos predecesseurs, d'heureuse memoire, que de les maintenir tous en bon-

ne paix & vnion, dans le deuoir & ob-
 beyssance qui nous est deuë, sous le
 benefice de nos Edicts, & de les trai-
 ter comme nos bons & fidels sub-
 iects, quand ils se contiendront dans
 les termes du respect & submission,
 qui sont deubs au Souuerain. N'ayant
 espargné aucun office de remonst-
 rance & diligence pour preuenir le mal
 qui estoit facile à preunir deuant que
 d'en venir à la voye de la force, que
 nous auons esté contraincts, à nostre
 grand regret, d'employer, pour con-
 seruer nostre royale dignité, & le pou-
 uoir que Dieu nous a mis en main,
 pour leuer les ombrages & meffiances
 qui leur ont esté diuersement donnez
 avec art & dessein, de nostre bonne
 foy, qui n'a oncques deffailly à per-
 sonne, & pour empescher les mal-
 heurs & accidents qui s'en sont ensuy-
 uis, & leur faire cognoistre avec les

fins des principaux auteurs & fau-
 reurs de ce desordre publicq, le fonds
 veritable de nos droictes & sinceres
 intentions à les cherir & conseruer
 tous en bon repos & iouyſſance libre
 & paisible de ce qui leur est concedé
 & octroyé par nosdicts Edicts: Et soit
 ainsi que nosdicts subiects de la Reli-
 gion pretenduë reformée ayent esté
 depuis mieux inspirez, & recognois-
 sans leur faute, & ceste verité, ayēt eu
 recours à nostre clemence & bonté,
 par tres-humbles supplications qu'ils
 nous ont enuoyé faire par deputez ex-
 pres, pour leur octroyer pardon, &
 abolir la memoire des choses passées,
 les receuoir & tenir cy apres comme
 nos autres loyaux subiects, en nostre
 bien-veillance. Nous inclinans tous-
 iours plustost à douceur & misericor-
 de, qu'à pouſſer plus auant la Iustice
 & rigueur de nos armes, bien qu'elles

nous ayent acquis des aduantages si-
gnalez, qui nous feroient esperer ai-
sément la suite & l'issue semblable. Et
voulans auoir esgard à leurs submis-
sions & deuoirs, donner la Paix à no-
stre Royaume, & reunir tous nos sub-
iects en amitié & concorde entre eux,
& à vne generale & vnanime obeyf-
sance enuers nous, & pour autres im-
portantes raisons & considerations
à ce nous mouuans : Par l'aduis des
Princes, Ducs, Pairs, Officiers de no-
stre Couronne, & Principaux de no-
stre Conseil, Auons dict, ordonné &
declaré, disons, ordonnons & decla-
rons par ces presentes, signees de no-
stre main: Voulons & nous plaist, que
l'Edict de Nantes, Declarations & Ar-
ticles, secrets enregistrez en nos Cours
de Parlemēt, seront de bonne foy en-
tretenus à nos subiects de la Religion
pretendue reformee en toutes leurs

parties, & comme ils en ont bien & deuëment iouy du temps du feu Roy, nostre tres-honoré Seigneur & pere, que Dieu absolue, & depuis nostre aduenement à la Couronne, au parauant ces derniers mouuements, que l'exercice de la Religion Catholique, Apostolique & Romaine, sera remise & restablie en tous les lieux & endroiets de ce Royaume, & pays de nostre obeyssance, où il a esté intermis, pour y estre librement & paisiblement continuée sans aucun trouble. Defendant très-expressement à toutes personnes, de quelque estat, qualité & condition qu'ils soient, sur peine d'estre punis, comme infracteurs de Paix, & perturbateurs du repos publicq, de ne troubler, molester, ny inquieter les Ecclesiastiques en la celebration du Diuin seruice, iouyssance & perception des dixmes, fruiets,

fruiets & reuenus de leurs Benefices, & tous autres droicts & deuoirs qui leur appartiennét: Cōme aūssi l'exercice de la Religion pretenduë reformee sera restablie aux lieux où il estoit, suyuant nostredict Edict, Declarations & Cōcessions, & les Sieges de Iustice, Bureaux de Recepte & Officiers de Finances, seront restablis en mesme estat ez Villes où ils estoient establis auant ces derniers mouuements : horsmis la Chambre de Nerac, qui sera establie en tel lieu que nous aduiserons bon estre, apres auoir entendu les remonstrances des Deputez de nostre Province de Guyenne. Voulons aūssi que toutes fortifications nouuelles des Villes, Places, Chasteaux, Forts & Forteresses, tenues par nosdicts subiects de la Religion pretenduë reformee, & specialement celles qui ont esté faictes es Isles de Ré & Oleron,

soient entierement démolies & razées, demeurans les anciennes murailles, tours, portaux, fossez & contr'escarpes en leur estat, avec defences à toutes lesdites Villes de plus fortifier de nouveau: & que pour l'effect desdictes desmolitions, hostages des principaux habitans desdictes Villes, seront mises mains de ceux qu'il nous plaira d'ordonner pour execution dudict razement. Afin que les officiers de nostre Couronne ou autres Commissaires deputez, puissent faire exécuter le contenu cy dessus, suyuant les instructions qui leur en seront données, Entendons que * toutes les Villes de ladicte Religion prétendue réformée, qui dans quinze iours apres la publication des presentes, se soumettront à nostre obeissance, & nous ouvriront volontairement les portes, iouyssent du contenu de la presente

* Au lieu de ces mots (villes de ladicte Religion) faut qu'il y aye villes retenues par ceux de ladite Religion prétendue réformée.

Declaration. Defendons tres-expres-
 sement à nosdicts subiects de la Reli-
 gion pretenduë reformée toutes sor-
 tes d'assemblées generales & particu-
 lieres, Cercles, Conseils, abregez de
 Synodes, & toutes autres de quelque
 qualité qu'elles puissent estre, à peine
 de crime de leze Majesté, s'ils n'ont
 expresse permission de nous : ains seu-
 lement leurs sont permises les assem-
 blees des Consistoires, Colloques, Sy-
 nodes pour pures affaires * Ecclesiasti-
 ques : Avec inhibitions tres-expresses
 d'y traicter d'aucune affaire politique,
 sur les peines que dessus. Demeureront
 aussi nosdicts subiects de ladicte Re-
 ligion pretenduë reformée deschargez
 de tous actes d'hostilité, de toutes as-
 blées generales & prouinciales, Cer-
 cles, abregez & autres, & de toutes au-
 tres choses generalement quelcscoques
 contenues es articles soixante & seize,

* Aulieu
 de ces
 mots (af-
 faires Ec-
 clestiasti-
 ques) faut
 qu'il yaye
 affaires
 concer-
 nans les
 Reglemés
 de la disci-
 pline de
 ladite Re-
 ligiō pre-
 tenduere-
 forme.

& soixante dixsept de nostredit Edict de Nantes , depuis le premier Ianuier mil six cens vingt & vn , iusques à present : En ce non compris les cas execrables , tels qu'ils sont specifiez & declarez par l'article quatre vingts-sixiesme dudit Edict , dont pourra estre faict recherche pardeuant les Iuges auxquels la cognoissance en appartient. Et pour ce qui est aduenu à Priuas , nous voulons en estre expedie abolition particuliere aux habitas dudit lieu: Ensemble au Sieur de Brisson. Et pour le regard des cōptables & autres officiers , en ce qui concerne les charges de leur maniemment , les Articles soixante & dixhuiet & soixante & dixneuf dudit Edict de Nantes, seront entierement gardez & observez. Pareillement pour les Iugements, Sentences , Arrests dōnez contre ceux de ladite Religion pretendue refor-

mée, qui ont porté les armes, Nous voulons qu'ils en soient deschargez, suyuant les articles cinquante huiet, cinquante neuf, & soixante dudit Edict. Comme aussi nous auõs validé & confirmé, validons & confirmons les Iugemens donnez par les Conseils & Iuges establis par les Chefs commandans aux Prouinces, soit en matiere ciuile, ou criminelle, & executions ensuyuies entre ceux de leur party: & lesdicts Iuges & Conseils deschargez de toutes poursuites pour ce regard, imposans sur ce silence perpetuel à nos Procureurs Generaux, leurs Substituts, & tous autres qui y pourroient pretendre interest. Voulons pareillemēt que tous prisonniers de part & d'autre, qui n'auront payé rançon, seront deliurez & mis en liberté, sans en payer aucune, & toutes promesses faictes & causées pour

rançons, qui n'aurōt esté acquittées au iour & datte des presentes, sont déclarées nulles & de nul effect, & cōme telles rendues. Cōme aussi toutes personnes de quelque qualité & conditiō qu'ils soiēt, serōt restablis en leurs biēs, debtes, noms, raisons & actions, charges, honneurs & dignitez, qui en ont esté priuez à l'occasion des presens troubles, Nonobstant tous dons & confiscations qui en pourroient auoir esté expediez, excepté des charges militaires, ceux qui en ont traicté de gré à gré, ou ausquels nous voudrons donner recompense : Ordonnons que l'observation de la presente Declaration soit entretenue & gardée par tous nos subiects, suyuant & en la forme prescrite par l'article quatre vingts deux de nostredict Edict de Nantes : Et que Commissaires Catholiques & de ladicte Religion preten-

duë reformée, seront par nous en-
 uoyez par les Prouinces pour faire
 executer le contenu en icelle, suyuant
 nostredict Edict. SI DONNONS EN
 MANDEMENT à nos amez & feaux
 les gens tenans nos Cours de Parle-
 ment & Chambre del'Edict, Baillifs,
 Seneschaux ou leurs Lieutenans, & à
 tous autres nos Iusticiers & Officiers
 qu'il appartiendra, que ces presentes
 ils facent lire, publier & enregistrer
 chacun endroict soy, & le contenu
 en icelles garder & obseruer inuiola-
 blement, suyuant sa forme & teneur,
 sans y contreuenir, ny souffrir y estre
 contreueni en aucune maniere. En-
 ioignons à nos Procureurs Generaux
 ou leurs Substituts d'y tenir la main,
 & de faire pour cét effect toutes in-
 stances, poursuittes & requisitions
 necessaires: CAR tel est nostre plai-
 sir. En tesmoing de quoy nous auons

faiEt mettre nostre seel à cesdites presentes. **DONNE** au camp de Montpellier le dix-neufiesme iour d'Octobre, l'an de grace mil six cens vingt deux. Et de nostre regne le treisiesme.

Signées, **LOVIS.** Et plus bas,
Par le Roy. DE LOMENIE.

Et scellées du grand seau de circiaune, sur double queüe.

Leuës, publiees & registrees, ony & ce consentant le Procureur General du Roy, pour estre executees selon leur forme & teneur, à la charge qu'au lieu de ces mots (Villes de la Religion) il sera mis, Villes tenues par ceux de ladite Religion pretendue reformee, & encores qu'au lieu de ces mots (affaires Ecclesiastiques) il sera mis, affaires concernans les Reglemens de la discipline de ladite Religion pretendue reformee, & que coppies collationnees d'icelles Lettres seront enuoyees aux Bailliages & Seneschauſſees de ce ressort pour y estre pareillement leües, publiees, registrees, executees, gardees & observees à la diligence des Substituts dudit Procureur General, auxquels enjoint d'y tenir la main, & certifier ladite Cour auoir ce faiEt au mois. A Paris en Parlement le 21. iour de Novembre mil six cens vingt-deux.

Signé,

DV TILLET.